

## 受揀選 ê 責任

經文：阿摩司 7:7-15

07/09/2006

佇主前 786 到 742 年烏西亞統治猶大，約阿施 ê 子兒耶羅波安二世統治北國以色列，In 拍倒歷史上所有 ê 對敵，甚至奪取南國猶大 ê 土地。Chit 時埃及 kap 亞述 ê 國勢衰弱，以色列佇耶羅波安二世 ê 治理下面，有超過半世紀 ê 太平盛世，社會一片繁榮 ê 景象，可惜貧富相差相當大，又受迦南宗教 ê 影響，上帝 ê 律法不斷遇 tiōh 破壞。祭司依 óa 權貴，剝削散赤人，濟濟人去敬拜偶像。阿摩司原本 tōa 佇猶大 ê 提哥亞，是牧羊人 mà 修剪桑樹。佇主前 760-755 年中間受召作先知，chiah 由南國搬去以色列，阿摩司來到首都伯特利，傳悔改 ê 信息。伊指出 In ê 事奉 kap 奉獻未得著接納，要徹底悔改 Chiah ì-tàng 活。伊講：「恁 tiōh 求好 m̄-thang 求 phái<sup>n</sup>, hō 恁得 tiōh 活；按呢耶和華萬軍 ê 上帝 beh kap 恁 tī-teh, 照恁所講。(5.14)」當時 ê 猶太人認為 In 會佇將來「耶和華 ê 日子」享福，總是阿摩司講 hit 日是罪人受審判 ê 日，猶太人 mà 無例外。上帝互阿摩司看見準線佇牆頂面，意思是上帝為百姓所定 ê 法則，這堵牆代表以色列人，上帝用準線來量 In ê 行爲，因為 In 背離上帝 ê 道。上帝講：「我無 beh koh 饒恕 in。」(7:8) 凡是無通過標準，向邪惡歪過 ê，攏會親像這堵牆全款倒落。阿摩司 ê 預言真緊著證實，佇耶羅波安二世了後 chia 30 冬，北國就滅亡 lah。

阿摩司 ê 信息 kah-ná 是對咱講 ê 一樣，設使上帝今 á 日問咱講，咱信仰 ê 準線佇叨落？你 ài 按怎回答？上個月底我佇 Holland, MI ê Western 神學院上 RCA 教會歷史 kap 宣教 ê 時，老師真憂心講：佇現代 kap 後現代思想 ê 衝擊下面長大，非基督徒因為無信上帝，追求物質 kap 享受成作生活的目標；基督徒 ê 信仰受 tiōh 個人主義以及阿米念派 (Arminian) ê 影響，認為信主了後已經得救，人猶原有完全 ê 自由，只要有信就好，bō-tu-tu 愛有 kap 得救相當 ê 行善，tūi 按呢真理漸漸 kap 世俗妥協，造成信仰世俗化，成做世俗文化中 ê 一種次文化，In 不接納加爾文 ê 救恩神學觀點，不承認上帝佇救恩頂面有主權，結果教會內少年一輩 jú 來 jú 少。Koh 加上社會 jú 來 jú 傾向非人性化，各種 bō 道德 ê 意識形態漸漸成做主流，親像媒體、政治人物假「好」之名來行「歹」之事。今 á 日作一 ê 上帝 ê 選民，咱 ài 掌握阿摩司有關「揀選」ê 信息。瞭解上帝揀選 ê 旨意，毋是互咱任意行事免負責任；mà 毋是靠咱 ê 努力，是無條件 ê 揀選，伊將「信心 kap 悔改」賜互伊所揀選 ê 人；執行公義 ê 審判，是 beh 清氣伊 ê 百姓，是必要 ê 更新 kap 復興 ê 過程。

上帝無論是對以色列群體或是先知個人 ê 選召，攏是有責任 kap 使命 ê。今 á 日咱已經有選民 ê 身分，總是咱對上帝國或是對上帝 ê 呼召要按怎回應 neh？選召 ê 用意，毋是互咱驕傲，自高。反轉上帝對選民有復卡高 ê 要求。伊 ài 咱虔誠 kap 奉獻，佇社會 mà ài 行公義、顧念散赤人。所以為上帝作見證，除了口講，更加要身軀去行，m̄-nā 個人要按呢行，教會 mà 是全款，雖 bóng 屬靈 ê 操練真重要，總是教會要 kap 社會有互動，chiah ì-tàng 收 tiōh 社會真實 ê 信息，chiah ì 知影按怎去服事社會。

世界是上帝創造 ê，無論人怎樣犯罪，伊攏 beh 離開，伊 iáu 是歷史 ê 主宰。Chit 位原來

不屬佇歷史 ê 基督，爲 tiōh 咱道成肉體活佇歷史當中，呼召咱 kap 伊同工，咱要改變世間無好 ê，成做好 ê 所在，因爲 chit-ê 價值是上帝賞賜，mà 是永遠 ê。上帝同時用疼 kap 公義來管理伊所造 ê 世界。m̃-koh 久長來教會真 chē 人毋愛講上帝 ê 公義，ka-ná 上帝無看重公義。現在 ê 教會攏強調上帝是疼，真少高舉上帝 ê 公義。當然 nā 無疼，咱早就滅無 lah；總是 nā 無公義，世界 mà 無可能有秩序。『疼』佇 chit-ê 世代已經互人扭曲。教會愛復興，應該 tiōh 看重上帝 ê 公義，上帝 ê 公義就是按怎樣對待 bô 公義。阿摩司對以色列人講：「lín 家已掠做降災厄 ê 日 iáu-kú 遠，hō 暴虐 ê 座位近 óa。」(6:3)全備 ê 信仰 bē-sái 無公義，無公義會互人看輕上帝 ê 恩典，扭曲上帝 ê 疼 kap 看輕伊 ê 道，復卡無法度看著咱 ê 時代責任。親像現時 ê 台灣，tú 佇一個關口。掌權者無閒 le 對抗謠言，煞隨在泛藍、媒體踏 tī 頭殼頂，造成社會 ê 混亂 kap 不安，chit 種 ê 執政者 kám 有清楚 beh kā 台灣 chhōa 去叨位？政治 ê 目的毋是爲著服務政治家本身或是 beh 當選，政治是爲著大多數 ê 人，建立一個公平 kap 公義 ê 多元社會，若無就失去伊 ê 價值。Beh 追求 chit ê 目標，執政者一定 ài 有使命感，親像李登輝前總統，伊身上背著台灣 ê 十字架，帶領台灣人行出互外來政權踐踏過 ê 驚惶，佇台灣 chit-ê 美麗島，建立一 ê 由人民主宰家己命運 ê 國家。這對佇一 ê 有信仰 ê 基督徒來講，當伊意識著上帝互伊 ê 使命了後，hit 種意志力，是任何人攏無法度 tàng 阻擋 ê。

最近有兩條新聞真映目，一條是今年 50 歲全世界尙好額 ê 比爾蓋茲 beh 佇 2 冬內慢慢將伊一手開創 ê 電腦王國放出，Tùi 2008 年 7 月起 ka-nā 保留董事長 ê 職務，伊 beh 將 khah chē 時間放佇「蓋茲基金會」。Chit-ê 基金會主要是提供獎學金互美國散赤學生，協助防治愛滋病，幫助第三世界對抗各類 ê 病。目前全世界對抗小兒麻痺 ê 資金有 90% 是 Tùi chia 來 ê，In ng 望佇健康 kap 學習 ê 領域頂面來造福人類。另外一條新聞是全世界第二好額人華倫·巴菲特有 440 億美金，伊宣佈將 85% ê 財產，捐出來做公益，無 beh 留互子孫。伊講錢財是 tùi 社會來 ê，就愛用佇社會，留互子孫是尙無智慧 ê 做法。伊又呼籲世界 ê 好額人，捐獻互社會，作後來人 ê 模範。蓋茲 kap 巴菲特 ê 做法 ka 咱說明，錢雖罔是測量人生成就 ê 方法之一，總是毋是全部；人類是上帝 ê 管家，當咱有錢了後，ài 用佇社會，幫助有需要 ê 人，這是做一 ê 基督徒 ê 責任 kap 使命。mā 有人會講我無錢，其實咱 bô 需要作大代誌才 ò-tàng tè 主 ê 腳步，耶穌是上帝 khng 佇咱中間 ê 準線，只要照耶穌吩咐 ê 去做，有人嘴乾互伊一杯涼水 lim; tng 腹體 ê 互伊衫穿；iau 餓 ê 互伊食；chiah-ê 攏是咱身軀邊會遇到，只要咱有心就做 ê 夠。5 月 27 日印尼中爪哇發生地動，現此時有超過 6000 人死亡，3 萬外人受傷，iaú 有 6 萬外人無家可歸。頂禮拜 ê 長執會決議贊助震災，向望兄姊 mà 同齊來關心。

今 á 日社會猶原流行亞米念 ê 個人主義，強調只要我歡喜有啥麼 bōe-tàng 作！總是咱佇教會內無論是豎啥物位，攏是回應上帝 ê 呼召，願意接受伊 ê 差派，立志透過咱活出信仰，是每一 ê 信徒 ê 認識。我相信上帝呼召咱去做 ê 代誌咱攏作 ê 夠，應該把握機會，毋 tàng 互伊失望。咱 e-thang tùi 阿摩司得著啓示，學習佇悖逆 ê 世代，按怎扮演上帝兒女 ê 角色，kap 上帝同工共同來創造歷史，這 mà 是作一 ê 基督徒尙 súi ê 見證。